

BILBAO, VV LGO, LATI NIS FLAVIOBRIGA.



BILBAO, vernaculè, Latinis Flaviobriga, & Flaviogallica olim dicta, vrbs Cantabrorum est in Hispania, celebris, & varijs rebus ad humanæ vitæ sustentationem necessarijs, abundans. Tribus verò in primis affluit, à quibus maximè commendatur: situs videlicet opportunitate, annonæ copia, negotiorumque & hominum mirabili varietate & multitudine. Sita est enim in loco plano, à mari duobus miliaribus distans, aère vti temperato, sic valde salubri. Nam ab ea parte, quæ terram respicit, magnis montibus circumdata, nec frigori nimio obnoxia est, nec calore nimio torrida. Ab altera parte, oppidulum habet in ore maritima, Portugallette, vulgò nuncupatum, à quo riuus quidam, maris ingens brachium, non solum in hanc urbem usque: sed in ipsas etiam domos influit. Hoc importari atque exportari paruo negotio, viliq̃ue pretio, varia mercium, aliarumque rerum genera indies est videre. Tanta annonæ copia abundat, vt vix in tota Hispania aliud oppidum sit, quod ei hac in re conferri possit. Tritici semper ingentem vim asseruat, quod fit, vt nec inopia, nec fame vnquam laboret. Panem habet singulari excellentia præditum, singulatim id genus, quod incolæ vernaculè, de arregoriaga, aut *pan del fuego*, vocant, quæ in furno non coquunt. Est etenim tam præstanti sapore, vt non sit, cui rectè comparctur. Vini quoque an vllum genus desideret, non facillè est dicere. Nam præter vernaculum & domesticum, tanta aliorum vinorum copia huc aduehitur, vt vltra 20. vinorum genera, quandoque libeat, facillè inuenias. Carnium insigni & copia & bonitate gaudet, in primis verò ouillæ & bouillæ, volucrumque omnis generis. In foro indies centum & plures puellas videre est; quæuis annonæ genera, copiose vendentes, quæ omnes incedunt capite aperto & nudo, capillisque tonsis, nec tamen propterea inelegantes. Heic enim est moris, virgines, ante, quàm nuptæ sint, nec capillos alere, nec velari. Nec est etiam cur piscium vllum genus requirat, cum & optimos habeat, & quantos ferè velit, eosque recentes. Pomorum est ei tam vberimus prouentus, vt nisi qui viderint præsentès, facillè adduci non possint, vt credant. Decem enim marauadisjs, quod pecuniæ genus istic loci minimum est, & decimam ferè stuferi Brabantici partem valore equat, tantum pomorum vulgò emitur, quantum mulus consueto onere portare solet. Frequentia commerciorum florentissima est. Hac enim plerunque & importari solet, quicquid vel Anglia, vel Belgica, vel Gallia mittit, quantumque Hispania cum alijs communicat, eadem hac solet exportari. Inter cætera verò, quæ euehuntur, plurima est excellentissima lana, ex qua in Belgica deportata, præstantissimi panni fiunt. Constat, hac lana quotannis quinquaginta naues onerari, quibus quinquagesies mille saccos & amplius auchi confirmant. In ipso foro machina est ad imponendas nauibus merces, exponendasque aptè constructa, vbi quantus sit toto die negotiorum feruor, mirabile est videre. Tota vrbe passim nil videas, quàm officinas & cellas, reponendis & custodiendis mercibus aptas, perpetuò plenissimas. Nauigationis enim commoditate fit, vt vel rarò vel nunquam contingat planè euacuari. Naues in hac vrbe, & eius territorio, quotannis plurimæ fiunt, quarum nonnullæ ingentes & altæ, secundum priuilegia quæ habet, aliæ vulgaris magnitudinis & formæ, penè innumeræ. Reperire heic est ciues, qui soli, propria pecunia vno anno, tres quatuorue naues ædificari curant. Hinc etiam omne genus apparatus nautici heic fieri consuevit. Hæc de ea Petrus de Medina in Hispaniæ descriptione, lingua vernacula scripta.